

# O LE SULU SAMOA



EKALEZIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



**FAAVAEINA 1839**

**O LE SULU SAMOA**

**APERILA 2023**

email: [sulusamoa@cccs.org.ws](mailto:sulusamoa@cccs.org.ws) - Main Office: Ph. 24414, Ext 30 - website: [www.cccs.org.ws](http://www.cccs.org.ws)

**OSIGA FEAGAIGA O APERILA 2023**



**Challis Pupi FS & Sarahnetta, ma nisi Tama o le Ekalesia @ EFKS Samusu**



**Senetenari Autagavaia AM & Leono, EFKS Weymouth, & Susuga Vaelua Patu FT**



**David Mafua AM & Leah, EFKS Tafua**

# FAASINO UPU

1. O LE LAUGA	2
2. OSIGA FEAGAIGA IA APERILA	3
3. FAASOLOGA FONO TELE 2023	4
4. FEAU O LE ASO	6
5. O LE PEROFETA MULIMULI	11
6. EFKS ULULOLOA & SIUSEGA	14
7. O E UA MALILIU	15
8. ATA O MATAUPU LOMIA	16

## O LE LAUGA

Tusi Faitau – Faamasino 6:1-10.

Matua – Faamasino 6: (vaega o le fuaiupu 10, “*O a’u o le Alii lo outou Atua, ‘aia tou te matatau i atua o sã Amorī...*”

Manatu Autu: Ua Mavae Iosua

O Iosua o le atalii o Nuno, ma Kalepo le atalii o Iefune. O i laua matutua ia na oo i le nu’u folafolaina (Kanana). E tusa ai ma le tala faamauina, o le asiasiga na o i Kanana, e toasefulu o le au asiasi na liliua le nu’u atoa i le faanoanoa ma le tagitu’i. O le faapogai lea o le faasalaga a le Atua i lona nu’u. O i latou uma ua atoa le luasefulu o tausaga ma sili atu e le oo i le nu’u folafolaina. E 40 aso na asiasi ai, na faatautaina i le 40 tausaga faatoa taunuu i Kanana, se’i feoti uma le au tailuasefulu tausaga ma sili atu.

O le mavae o Iosua ina ua valaau lona Matai i le atoa ai o lona 110 tausaga, faatasi ai ma toeaia sa latou molimauiina vavega tetele na faia e lo latou Atua. Ua tula’i mai tupulaga latou te le’i iloa vavega tetele na faia e le Atua, ma le o ese mai Aikupito ai le mea na nofo pologa ai. Ua lafoa’i le Atua na faatuatua ma auauna i ai o latou tamā, a e fai le amio leaga, ua fiafia i le faitaaga ma tapua’i i atua faapaupau pei o Paala ma Asaira.

O le mafuaaga lena na fa’aaogaina ai e le Atua nuu faapaupau e faasala ma faato’ilalo lona nuu. Ua ia tofia Mitiana, o i latou na tutupu mai ia Kitura le toalua lona lua o Aperaamo. O sauaga a le au Mitiana ua nonofo ai tagata Isaraelu i lua i luga o mauga, o ana, ma nofoaga nofo olo. O faatoaga ma lafu manu a tagata Isaraelu ua faatamaia e tagata Mitiana ma Amaleka ua oo lava i Kasa. Ua aunoa ma se mea ‘ai mo tagata Isaraelu ma latou manu. Ona matuā matitiva ai lea o Isaraelu ona o Mitiana. Ua lagona e le nuu lo latou sesē, ona alalaga ai lea i lo latou Atua mo se fesoasoani.

Ua faafofoga le Atua i le tualaga a lona nuu, ma ua faailoa atu e le perofeta ia Isaraelu le feau mai le Atua. “*O a’u na ou aveina a’e outou nai Aikupito, ma a’u aumaia outou nai le mea na nofo pologa ai. Na ou laveaiina outou ai le lima o Aikupito, ai lima o i latou uma sa faasaua ia te outou. Na o’u tulia i latou i o outou luma, ma ou avatu fo’i o latou laueleele mo outou...*” ‘Aua tou te matata’u i atua o sã Amorī, e o latou le nuu ua outou nonofo ai. E ala ona outou pologa, ona ua outou lē auauna i le Atua.

Ua leva ona valaau le Atua i lana auauna o Iosua. O le auauna sa galue o se pologa i Aikupito. Sa avea ma soatau ia Mose, sa avea ma ta’ita’i mo le nuu, e sopoia le Ioritana ma ulufale i Kanana. Na ia vaevae ma tofofi le nuu o Isaraelu i Kanana i ituaiga 12 o le nuu o le Atua. A o le tulaga ua tula’i mai, ua maliu Iosua a e na te le’i tapenaina se tagata e sui tulaga ia te ia. Sa tofia Iosua e Mose e fai ma ona fesoasoani, o se avanoa sa a’oa’o ai e fai ma ta’ita’i. Na ona mavae atu lava o Iosua, lafoa’i lo latou Atua a e ola i le ola a manu, ua faitaaga ma tapua’i i atua faapaupau. O le mavae atu o Iosua, o se feau ua faamanatu mai mo lana Ekalesia ma malo uma o le lalolagi. O le fesili; O tapena e ta’ita’i o nei aso nisi ta’ita’i fou i le lumana’i na te fa’auauina tiute faata’ita’i?

Tele malo o le lalolagi ua lē fia o ese ta’ita’i, ua fai a latou faiga pei o se mea a se aiga. A o le faanoanoaga, ona o le tele o soifua ua fano ai. Pulega faafitafita aemaise aiā tatau faale-tagata soifua. Sa tapena e Mose o Iosua, e sui tulaga i lona tulaga ta’ita’i. Na tofia fo’i e Elia o Elisaia e fa’auau lona tulaga faaperofeta. Na filifilia fo’i e lo tatou Ali’i lona au soo e fai ma aposetolo o le Talalelei. Ia saunia faale-agaga le au usufono o lenei tausaga, ia maua se tofa e tapena ai pea lana Ekalesia mo le lumana’i.

---

Ua tatou iloa o taimi o Iosua sa mafai ona ia foia faafitauli o le nu'u pei ona ia fai atu i le nu'u, *"Ina filifilia ia outou po o ai tou te auauna i ai, a o a'u ma lo'u aiga matou te auauna i le Alii."* Na faalogo le nu'u ma toe auauna i le Atua soifua. E ao ona lu'itau le Ekalesia i le tele o faalavelave ua aafia ai le Ekalesia a le Atua ma o le a aafia ai pea le Talalelei a Keriso.

- Faama'i e pei o le Koviti-19.
- O lotu lē kerisiano e faaulufale mai i Samoa.
- Faifeau ua o ese ai tagata lolotu po o aulotu.
- Le aao oo a le Ekalesia ia i latou o matitiva masaesae o le tatou Ekalesia.

Ua mavae Iosua, o se faamanatu mo i tatou uma. O le tagata sa i ai le Atua, o le faailoga ua mavae le Atua i a tatou auaunaga ma faaiuga fai. Ia viia le Atua i auaunaga ua o tatou ofoina mo le Atua ma lana galuega. A o se lu'i e ao ona tuu atu i ou autafa ma o'u fo'i autafa. Ne'i fai ma vi'iga o le au fai tonu, a e masiasi ai le au matitiva ma aga'i atu i isi Ekalesia, emo ane le ata e toe fufusi ai le a-ato a le au faitonu.

A o tatou savalia le 40 aso, ma lo tatou Keriso manumalo, a o le'i afio i le lagi ma auina ifo lona Agaga Paia i le aso Penetekoso. Ia tatou tautino o tatou o tagata agasalala ma faatauvaa, e lē feauga ma le mamalu o le Atua. Ia pai mai lona mana faaola e lavea'i o tatou tagata.

O lona agaga lena sa ia Kitiona na mafai ai ona lavea'i lona nu'u i faiga sauā a Mitiana. O le aao malosi o le Atua na faaititia ai e na o ma Kitiona mai le 22,000 i le 300 fitafita. O le Atua tatou te mafaia ai ona foia soo se faafitauli o le olaga e oo mai.

Ia manuia le alo atu o le Ekalesia i lana Fono Tele o lenei tausaga i le masina fou. Alofagia tapenaga uma a le Ofisa Tutotonu, le laulau a le Fono Tele, le nofo a Komiti a le Ekalesia tainane foi usugafono filifilia o lenei tausaga 2023. Faamanuia fo'i le Atua i le tapuaiga a le nofo a Matagaluega i Samoa ma atunuu i fafo. Soifua, ona o Iesu. Amene.

***Saunia: Susuga Elisaia Fiu Kolia (FS)  
EFKS Matautu-Uta  
Matagaluega APIA***

---

### **3 FEAGAIGA, ASO E TASI**

O le Aso Faraile 28 Aperila na osia ai feagaiga a nisi Aulotu ma o latou faifeau, i Samoa ma Niu Sila.

#### **1. EFKS SAMUSU, PULEGA ALEIPATA, MTG. LOTOFAGALEPA ALEIPATA.**

O le susuga **Challis Suiki Pupi FS** ma le faletua ia **Sarahnetta**, mai le EFKS Vaitele-uta FALEATA, ua osi le feagaiga ma le EFKS Samusu, Pulega Aleipata. O le lona valu ai lea o faifeau a le Ekalesia, e tusa ma le molimau a le sui o le Aulotu. O le susuga Challis o se alo faasino ia Alapati Pupi ma Tuaoitau (silasila i le ata itulau 16), na i'u mai Malua i le tausaga 2019, ona galue lea i le Ofisa Tutotonu o le Ekalesia i le Ofisa o Fanua ma Fale. O lona faletua ia Sarahnette o se alo o le susuga faafeagaiga ia lakina Alefaio FS ma Matagatau Faamoana-Alefaio (ua maliu). O le susuga Pati Vili FT le Toeaina Faatonu o le Matagaluega LLA na ta'ita'i le sauniga, na molimauina e le mamalu o le Ekalesia, le Sui Ao ma aiga na lua faapea le afioaga ma le itumalo.

#### **2. EFKS WEYMOUTH, PULEGA MANUKAU SASA'E, MATAGALUEGA MANUKAU.**

O le susuga **Senetenari Autagavaia FS** ma le faletua ia **Leono**, ua osi le feagaiga ma le EFKS Weymouth, Pulega Manukau i Sasa'e, Matagaluega MANUKAU i Niu Sila. O le susuga Senetenari o se A'oa'o Nofo Aiga o le EFKS Vaitele-uta, FALEATA na galue i le Ofisa Tutotonu o le Loia a le Ekalesia. Na faamavae i le tausaga 2022 ma faaiipoipo ma le faletua i le EFKS Sapapalii i le faai'uga o lona tausaga. O le Toeaina o le Pulega Manukau Sasa'e, susuga Alosina Vavae FT na ta'ita'i le sauniga na molimauina e le toatele o le paia o le Ekalesia, ma le mamalu o aiga ma le atunuu.

#### **3. EFKS TAFUA, PULEGA PALAULI, MATA-GALUEGA FAASALELEAGA.**

O le susuga **David Mafua AM** ma le faletua ia **Leah**, mai Matautu Falelatai ma Fuailoloo, ua osi le feagaiga ma le EFKS Tafua. Na ta'ita'i Leaso Tupa'i FT, tatalo Enoka Aperaamo FS, Faitau Tusi Paia le susuga Fereti Sefo FS. O le susuga Aviti Etuale FT (Toeaina Faatonu Matagaluega Vitoria) na lauga mo le faifeau ma le faletua, a o le ta'ita'i o le sauniga na faala'ei'au mo le Aulotu ma le faapotopotoga. O David ma Leah ua sui tulaga ia Niulala Kupa FS (na maliu 2022) ma Loreta i le galuega i Tafua. Ia manuia feagaiga osi, ia viia le suafa o le Alii.

---

# FA'ASOLOGA FONO TELE 2023

## MALUA, ASO 15 - 26 ME

**“Ō ATU IA E FA'AMALŌLŌ MA FA'ASA'OLOTO O'U TAGATA”**  
*Go forth to heal and free My people*  
*(Mataio 10 : 8)*

<u>ASO</u>	<u>TAIMI</u>	<u>FONO &amp; SAUNIGA</u>	<u>NOFOAGA</u>
<b>ASO GAFUA</b>	10.00am	Komiti Faatonu	Fale Mafutaga
<b>15/05/23</b>	7.00am	Asiasiga Komiti o Atinae	
	1.00pm	Fono Komiti o Atinae	Fale Fono
	7.00pm	Lotu Talosaga Au Toeaina	Fale Iupeli
	<b>Taitai:</b>	<b>Tauaaga Mataafa FT</b>	<b>Kuiniselani Saute</b>
<b>ASO LUA</b>	9.00am	Komiti Au Toeaina	Fale Mafutaga
<b>16/05/23</b>		Komiti o Aoga	Fale Fono
	9.00am	Faletua Au Toeaina	Fale o Tina
	7.00pm	Komiti Faamisionare	Fale Fono
<b>ASO LULU</b>	9.00am	Komiti o Feau Eseese	Fale Fono
<b>17/05/23</b>	9.00am	Komiti Au Taumafai	Fale Mafutaga
	9.00am	TPT: Tautua Puapuaga o Tagata	Fale o Tina
	10.30am	Lotu Tatala ai Fono Tupulaga	Fale Iupeli
	<b>Taitai:</b>	<b>Efu Efu FT</b>	<b>Apia</b>
	2.00pm	Pepa mo Tupulaga Talavou	Fale Iupeli
		<i>(Faataoto fuafuaga mo le Fono a Tupulaga)</i>	
	7.00pm	Lotu Au Taumafai	Fale Iupeli
	<b>Taitai:</b>	<b>Isaako I. Patea FT</b>	<b>Niusaelese</b>
<b>ASO TOFI</b>	9.00am	Komiti o Tupe	Fale Senetenari
<b>18/05/23</b>	9.00am	Komiti Au Leoleo	Fale Mafutaga
	9.00am	Lotu Mafutaga Tina	Fale Iupeli
	9.00am	Fono Tupulaga	Fale Fono
	1.30pm	TPT: Teine Papauta Tuai	Fale o Tina
	7.00pm	Lotu o Nuu Ese	Fale Iupeli
	<b>Taitai:</b>	<b>Fiatepa Faaee FT</b>	<b>Aukilani</b>
<b>ASO FARAILE</b>	5.00am	Lotu Au Leoleo	Fale Iupeli
<b>19/05/23</b>	<b>Taitai:</b>	<b>Fiaalua'e Tiata FS</b>	<b>Vitoria</b>
	9.00am	Mafutaga Tina	Fale o Tina
	7.00pm	Fono Malua Tuai	Fale Mafutaga
<b>ASO TOONAI</b>	9.00am	<b>SAUNIGA O LE FAAUUGA</b>	<b>Fale Iupeli</b>
<b>20/05/23</b>	<b>Taitai:</b>	<b>Makerusa Porotesano FT</b>	<b>Amerika</b>
	<b>Tusi Paia:</b>	<b>Lance Tautiepa FT</b>	<b>Kuiniselani</b>
	<b>Tatalo:</b>	<b>Pouniu Faamausili FT</b>	<b>Aukilani</b>
	<b>Faaeelima:</b>	<b>Makerusa Porotesano FT</b>	<b>Taitai Sauniga</b>
		<b>Asotasi Gu Time FT</b>	<b>Taitaifono KAT</b>
		<b>Simeona Taefu FT</b>	<b>Niusaelese Sisifo</b>

	<b>Faaeelima:</b>	<i>Aviti Etuale FT</i>	<i>Vitoria</i>
		<i>Faatulituli Setu FT</i>	<i>Laumua o Aotearoa</i>
		<i>Tunumoso S. Iosia FT</i>	<i>Taitaifono Fono Tele</i>
	<b>Tuuina atu A'oa'o:</b>	<i>Leaso Tupai FT</i>	<i>Failautusi KAT</i>
	<b>2.00pm</b>	<b>Lotu a Tupulaga</b>	<b>Fale Iupeli</b>
	<b>Taitai:</b>	<i>Talia Tapaleao FS</i>	<i>Manukau</i>
	<b>7.00pm</b>	<b>TUFA FAILA A USUFONO</b>	<b>Fale Fono</b>
<b>ASO SA</b>	<b>9.00am</b>	<b>LOTUTAEAO/FAAMANATUGA</b>	<b>Fale Iupeli</b>
<b>21/05/23</b>	<b>Taitai:</b>	<i>Alosina Vavae FT</i>	<i>Manukau</i>
		<b>LOTU TAEAO/FAAMANATUGA</b>	<b>Fale o Tina</b>
	<b>Taitai:</b>	<i>Lauie Lupematasila FT</i>	<i>Kuiniselani</i>
	<b>6.00pm</b>	<b>LOTU AFIAFI</b>	<b>Fale Iupeli</b>
	<b>Taitai:</b>	<i>Meki Lauvi FS</i>	<i>Laumua o Aotearoa</i>
		<b>LOTU AFIAFI</b>	<b>Fale o Tina</b>
	<b>Taitai:</b>	<i>Galuefa Leilua FS</i>	<i>Hawaii</i>
<b>22 - 26,</b>		<b><u>USUIA LE FONO TELE</u></b>	
<b>ASO GAFUA</b>	<b>8.30am</b>	<b>Tapuaiga Amata</b>	
<b>22/05/23</b>	<b>Taitai:</b>	<i>Tunumoso S. Iosia FT</i>	<i>(Taitaifono)</i>
	<b>9.00am</b>	<b>PALOTALE SUI TAITAIFONO FONOTELE</b>	
	<b>9.30am</b>	<b>Pepa: Dr. Malutafa Faalili FS</b>	<i>(Kolisi Malua)</i>
	<b>10.30am</b>	<b>Amata Taulumaga o le Fono Tele</b>	
	<b>1.00pm</b>	<b>Malolo mo sina taumafataga māmā</b>	
	<b>1.30pm</b>	<b>Faaauau Taulumaga o le Fono Tele</b>	
	<b>5.00pm</b>	<b>Malolo le Fono</b>	
<b>ASO LUA</b>	<b>8.30am</b>	<b>Tapuaiga Amata</b>	
<b>23/05/23</b>	<b>Taitai:</b>	<i>Tumama Vili FT</i>	<i>(Penisione)</i>
	<b>9.00am</b>	<b>Faaauau Taulumaga o le Fono Tele</b>	
	<b>1.00pm</b>	<b>Malolo mo sina taumafataga māmā</b>	
	<b>1.30pm</b>	<b>Faaauau Taulumaga o le Fono Tele</b>	
	<b>5.00pm</b>	<b>Malolo le Fono</b>	
<b>ASO LULU</b>	<b>8.30am</b>	<b>Tapuaiga Amata</b>	
<b>24/09/23</b>	<b>Taitai:</b>	<i>Laki R. Slade FT</i>	<i>(Penisione)</i>
	<b>9.00am</b>	<b>Faaauau Taulumaga o le Fono Tele</b>	
	<b>11.00am</b>	<b>SAUNIGAA LOAIAAU PENISIONE</b>	<i>(Fale Iupeli)</i>
	<b>Taitai:</b>	<i>Tunumoso S. Iosia FT</i>	<i>(Taitaifono)</i>
	<b>1.30pm</b>	<b>Faaauau Taulumaga o le Fono Tele</b>	
	<b>5.00pm</b>	<b>Malolo le Fono</b>	
	<b>7.00pm</b>	<b>Faafiafiaga – Autalavou EFKS Vailuutai &amp; Faleatiu</b>	
<b>ASO TOFI</b>	<b>8.30am</b>	<b>Tapuaiga Amata</b>	
<b>25/05/23</b>	<b>Taitai:</b>	<i>Tanielu LeMamea FT</i>	<i>(Penisione)</i>
	<b>9.00am</b>	<b>Taulumaga o le Fono Tele</b>	
	<b>1.00pm</b>	<b>Malolo mo sina taumafataga māmā</b>	

---

1.30pm Faaauau taualumaga o le Fono Tele  
5.00pm Malolo le Fono  
7.00pm **Feiloaiga Au Toeaina & Aufaigaluega Faifeau**

**ASO FARAILE**  
**26/05/23**

8.30am Tapuaiga Amata  
**Taitai: Tunumoso S. Iosia FT (Taitaifono)**  
9.00am Tualumaga o le Fono Tele

**TAUALUMAGA O LE FA'ASOLOGA O LE FONOTELE:**

- 1 **Faamaonia Iugafono Fono Tele 2022 & Faavae**
- 2 **Mau Tu'u Sa'o mai Matagaluega**
- 3 **Mau Tuu Sa'o mai Komiti Tetele e Ono a le Ekalesia**
- 4 **Faamaonia Galuega a Komiti**
  - i. Komiti o Tupe
  - ii. Komiti o Feau Eseeese
  - iii. Komiti o Aoga
  - iv. Komiti o Atinae
  - v. Komiti Faamisionare
  - vi. Komiti Au Toeaina
- 5 **Palota Failautusi Aoao**
- 6 **Palota Sui Taitaifono**

**FAILAUTUSI**

---

**FEAU O LE ASO**

Aso Sa, 23 Aperila.

Tusi Faitau: Faamasino 10: 6 – 11:11; Matua: <sup>18</sup>*O ai se tasi na te amata ona tau ma le fanauga a Amoni? e fai o ia ma alii sili i e nonofo uma lava i Kiliata.*

Manatu Autu: **O ai e alu a'e mo i tatou?**

O le ulua'i fesili lava lenei a Isaraelu i le Alii ina ua maluu Iosua, <sup>14</sup>*Po o ai e muamua ona alu a'e i sa Kananā mo i matou, e tau ma i latou?* Faama I. O le tali a le Atua, o faamasino na Ia totofi auaua'i mai i lea tupulaga ma lea tupulaga, e faaola i latou mai o latou fili. O lea ua latou toe fesili ai foi, a o latou to lauapi i Mesepa, fesaga'i ma le fili o Amoni

o aga mai i Kiliata. O le toasā o le Atua i le ola femoumouai o Isaraelu, i lo latou lafoa'i o Ia a e mulimuli i atua faapaupau, na Ia tali muamua atu ai, <sup>14</sup>*O ia, ina valaau i atua ua outou loto i ai, se'i latou faaola ia te outou...* O le tali e peisea'i ua tuulafoa'i e le Atua lona nuu, peitai e leai; a o le tali ia iloa ai e le nuu lē usitai i le Atua, e lē tuufauina i latou e saga fai pea le agasala, ma e na o le Atua e maua ai le faaolataga moni mai mafatiaga, pe a latou salamō ma toe foi atu ia te Ia. Ui i lea, sa faapalepale pea lona alofa mutimutivale, na te onosa'ia ai amio leaga o lona nuu. Mo lea lava auga tupulaga, o le tali mo le fesili a le fia ola, na Ia auuina mai ai Iefata le Kiliata e lavea'i le nuu.

---

A o si nei toa malosi o Iefata, talofa e, sa inosia muamua e ona lava uso, na latou tuli ese o ia mai lona aiga moni, fai mai e leai sona tofi. Na sola ese Iefata, faapotopoto lana vaega o isi foi tagata faatauavaa na lē amana’iaina e le sosaiete. Ma na oo i aso e tau ai le taua a Isaraelu ma Amoni, sa leai se Isaraelu e i ai le loto tele e tali atu ai i le fesili – o ai e alu a’e? Ona latou toe aami lea o Iefata, na latou inoino muamua i ai. Ua tusa ma le mau a le Fai Salamo, *“<sup>22</sup>O le maa na lafoa’iina e tufuga fai fale, ua fai lea ma maa tulimanu aupitoaluga.”* Sala.118.

E pei o Isaraelu, o le tele o puapuagā tatou te fetaiiai, e mafua mai i lo tatou lē usitai i le Atua ma o ese mai ona ala. E lē uma osofaiga, ma e tofu le auga tupulaga ma se Amoni i Kiliata, o ituaiga autau a le fili tatou te fetaiia’i, e ao ai ona tatou mataala pea ma sauniuni. Pe a tapena foi osofaiga i Mesepa, ia tautuanā auupega faaleagaga, aemaise afioga paia a le Atua o le pelu a le Agaga, o le auupega e sili ona ma’ ai.

Ua lē masino le tele o fili fesagai ma le tino vaaiia o Keriso i nei aso, e lē gata o osofaiga mai fafo atu, a o totonu lava foi o le Ekalesia, o taavili solo ai le tiapolo ma ana auala e faaleaga, faasesē ma faatoilalo le au faatuatua. O loo fesili mai le feau o lenei aso ia te oe ma a’u, pe mafai ona tatou tula’i atu pei o Iefata, e amatamea i le lagaina o osofaiga faasaga i le fili. Ne’i tatou tau saili po o ai Amoni a o fea Kiliata i nei aso, e lelei le silasila ifo o le tagata ia te ia lava – mata o oe ma a’u, o tatou lava le fili. Ina ua tatou pei o le aiga o Iefata, e nonofo faatasi a e toe fetuia’i, felamata’i ma ‘eli tuugamau ia pa’ū i ai le isi uso. O le au uso faasausili e vaai maualalo ma faatauavaa i isi, na o le fia tama mamafa ma fia tama autū, a e tula’i mai puapuaga, e aunoa se loto tele, papa’u le tofa, mativa le agavaa, e tula’i atu ai i taimi ua mana’omia ai se Isaraelu moni. Tula’i mai nei, auā e i ai le tau lelei, e fai ma alii sili i e o nonofo i Kiliata.

O le fesili lenei na muamua lava lagona i Etena ina ua toilalo le uluai tagata. Ma o le Atua lava ia na tali, ma amata tapena le faaolataga ia toe faaeaina le tagata agasala, e ala i lona Alo o Iesu, na alu a’e i le satauro mo i tatou *“<sup>9</sup>O le mea lava lea ua matuā faaeaina ai o ia e le Atua, ma foaiina atu ai ia te ia o le suafa e silisili i suafa uma lava...”* Amene.

Aso Gafua, 24 Aperila.

Tusi Faitau: Faamasino 11: 29 – 40. Matua: *“<sup>40</sup>O lea tausaga ma lea tausaga ua o ai afafine o Isaraelu e vivii i le afafine o Iefata le Kiliata.”*

Manatu Autu: **Tautoga Tuulafoa’i.**

Pe afai e faatusatusa le taulaga a Iefata ma le taulaga a Aperaaamo, ona iloa lea e i ai itu e tutusa ai, a e i ai foi nisi vaega e lē paleni. O Aperaaamo sa na o le toatasi lona atalii, na mana’omia e le Atua e osi ai le taulaga, ina ia tofotofoina ai lona faatuatua; peitai na toe faalava le Amoā, ma lavea’iina ai le tama o le folafolaga o Isaako. E toatasi le afafine pele o Iefata, na ia folafola e osi ai le taulaga i le Atua; a e sa le’i faalavelave le Atua pe na te taofia, a o faae’ e le oti i le afafine e lona lava tamā. I le tasi itu o loo susulu mai ai le usitai o Aperaaamo le tamā ma le tupuaga o Kerisiano, o Iutaia, ma Mosalemi. A o le isi tulimanu, o loo lafoia ai ataata o le pogisa o vaivaiga o le tagata pei ona faatino ai e Iefata se tautoga soona tuulafoa’i, ma le sālō o le Atua. O se tala aupito sili ona faanoanoa lenei i le Tusi o Faamasino, mata e tutusa ma le tala i le fafine malepelepe a le sa Levī, o mulimuli mai i le faai’uga o le vaiaso. E oo i le nuu e ta’u soo lona igoa o Mesepa na fai ai le tautoga, ua na aumai se ata faauigalua. O le uiga o lea upu, *O le ‘olo e mata ai*, mai le a’a o lona uiga *‘ia vaai’* pe ia *mata’itū*“ faasino i se mauga po o se olo na fausia mo le puipuiga o le saogalemū. Peitai e tuufaafegagai ma Iefata o se taitai sa le’i vaai lelei, sa le’i toto’a lana mata’itu. Ua na fai le tautoga tuulafoai, aunoa ma se manatu mamafa pe silasila mamafa i ona tuatuagia ma aafiaga mulimuli mai. E lē pei o Aperaaamo na ia tepa a’e, *“ma ua iloa lea mea a e mamafa”*, na ia tepa a’e foi i fetu o le lagi ma iloa ai le toatele o lana fanau. E lē gata i lea, a e foliga mai sa le’i māua lelei e Iefata le moni o le mau faa-Isaraelu faasino i taulaga osi, pei ona tatau ai i aso anamua, e ofoina atu saoloto; e lē mafai ona ia suia le mafaufau o le Atua o Isaraelu. O le tuuina atu e Iefata o lona afafine e toatasi mo lenei Atua, ua na faalataina ai lona lava talitonuga lē sagatonu. O le aunoa o se afioga a le Atua a o faatino le faalētonu a Iefata, o se mea e lē manofa lelei ai – peitai o le tuuaiga mo le oti o lona afafine e i luga o Iefata na o ia. E musu Iefata e talia tuuaiga mo lona sesē, ma peiseai ua ia uunai i luga o le tagata ua faamanu’alia. E pei o le toatele o isi fafine i le Tusi o Faamasino e oo mai nei, o si nei afafine e lē iloa sona igoa, e mamā o ia, a ua na totogi le tau mo le agasala ma le sesē o le isi tagata. Faamalalamalama e le Agaga le uiga loloto o ana afioga, ma ia ia te Ia le viiga. Amene.

---

## Aso Lua, 25 Aperila 2023.

Tusi Faitau: Faamasino 13: 2 – 25; Matua: “<sup>7</sup>*Faauta, o le a to oe, e te fanau mai foi le tama tane; o lenei, ‘aua e te inu uaina....auā e faia le tama ma naseri i le Atua...*”

### Manatu Autu: **Fafine Atamai**

E ui ina e lē o ta’ua sona i goa, a ua avea le tinā o Samasoni ma ogatotonu o le faitauga o lenei aso, ina ua la fesaga’i ma fetufaa’i ma le agelu a le Atua. E pei o Sara ma Hana, faapea Elisapeta ma Maria, o lenei fafine sa loto atu e fai ma sui auai i fuafuaga mamana ma ofoofogia a lona Atua. Tatou te vaai i lenei tala ma lenei fafine atamai, se matālalaga masani ma foliga tutusa o loo mamana ai tala o le Feagaiga Fou mulimuli mai. E lē gata i lea, a ua na aumaia foi mo i tatou se suiga lelei ma le faa-fiafia loto, mai faamatalaga o agasala ma faanoanoaga i totonu o tala ia Iefata talu ai. Ua tatou iloa iinei i le fesagaiga a le fafine ma le agelu, se lalolagi e matala ma avanoa mo le paia o le Atua ma Lona auai mai. O le ta’u atu e le agelu i matua o Samasoni o le tiute i le lumanai o la la’ua tama, ua alu a’e ai i luga le agelu, faatasi ma le mumū o le afi o osiga taulaga. Ua matata’u mātua faaolioli, ina ua la’ua iloa o loo latou faatasi ma le paia o le Atua (“<sup>22</sup>*E oti lava i ta’ua, auā ua ta vaai le Atua.*”), e faapea foi Elisapeta ma Maria mulimuli mai i le Feagaiga Fou.

E faalua i lenei tala ona ta’ua le upu *silisili ese, vavega/foofogia* faasino i le agelu a le Atua (f18 & 19). O le upu foi lea o loo fa’aaogā i le Esoto 15:11 e faamatala ai le vavega na faia i le Sami Ulaula (“<sup>11</sup>*Le Alii e, o ai ea se ua tusa ma oe i le vao atua? O ai se ua tusa ma oe, o lē silisili ona paia, o lē mata’utia i viiga, o lē fai vavega?*”). O loo ta’ua foi i le Salamo 139, ina ua maofa le fai Salamo i auala mamana a le Atua, aemaise foi ia te ia le tagata, o se foafoaga ofoofogia a le Atua (“<sup>6</sup>*O le poto lea e sili ona faigatā ia te au, ua maualuga, ou te lē mafai...<sup>14</sup>Ou te vivii atu ia te oe, auā na faia a’u e ala ai ona mata’utia ma ofo tele ai; o mea na e faia, o mea mamana ia.*”) O le igoa ‘Samasoni’ i le faa-Eperu, o lona uiga ‘e pei o le la’, ma e pei ona molimauina i le soifua o Samuelu, Tavita, Ioane le Papatiso ma le Alii o Iesu, sa auai le Agaga o le Atua ia te ia (“<sup>25</sup>*Ua amata...e le Agaga o le Alii...*”). Pe mata o ia lea a fanau mai e le fafine, e susulu pei o le la, na te lavea’i i lona nuu? O le fafine atamai, ma soo se matua poto e mata’u i le Atua, na te fanaua ni tama e fai ma faaea aiga, o nuu ma malo aemaise le galuega faaola a le Atua. Amene.

---

## Aso Lulu, 26 Aperila 2023

Tusi Faitau: Faamasino 14: 1 – 20. Matua: “<sup>14</sup>*Na alu atu le mea e ‘ai nai lē ‘ai mea; na alu atu foi le mea suamalie nai lē malosi.*”

### Manatu Autu: **Samasoni le fai togafiti**

O faamoemoega mo se lavea’iina tele e faia e Samasoni, e faaitiitia a o tatou faitau faasolo i lona tala. Ua lē o se ta’ita’i e loloto le tofa pe mamao le faautaga - se tasi e soo i lona tina atamai ma mata’u i le Atua, pe agamalū ma talimālō pei o lona tamā - a o se tagata e usitai ma faalogo i lagona vaivai o ona tu’inauga, e pei ona sa ia nanau ai i le fafine Filisitia e lalelei i le vaai o ona mata (“<sup>2</sup>*Ua ou iloa le fafine i Timenata, o le fafine o Filisitia, ia oulua au mai o ia e fai ma’u avā.*”) Ua ta’uta’ua ma lauiloa Samasoni o le ‘tagata malosi’ i le Tusi Paia, a o le upu moni o ia o se tasi aupito sili ona vaivai, toilalo gofie ma tauaso i ona lava tu’inauga taatele. O le *mea e ‘ai, suamalie, malosi...* o upu o le tupua a Samasoni, latou te faaosofia lagona o mana’oga faaletino e fesoota’i ma tausamiga o faaipoipoga. O nei foi upu latou te fafagu mai le faaleoina o le alofa i le Pese a Solomona 8, “<sup>6</sup>*ua malosi le alofa e pei o le oti; ua faauihulumamau le tu’inanau e faapei o le tu’ugamau; o lona mumū, o le mumū lea o le afi mu saesae.*”

O le ‘malosi’ ma le ‘suamalie’ e molimau lautele i le soifuaga ma le talaaga o Isaraelu ma la latou fe’umiaiga ma lo latou Atua. O le Atua o Isaraelu o le Atua *malosi* i Lana faaolataga (e pei ona sa Ia faia i le Sami Ulaula, Esoto 14); ma Na aumaia se ituaiga soifuaga faatonutonu lelei, e ala i Ana tulafono ma poloaiga, “<sup>10</sup>*e sili ona suamalie i lo le meli, o le meli ua sisina ifo.*”

I lenei faauigaina lautele, ua avea ai Samasoni e fai ma sui na te faailoa mai le olaga o lona nuu atoa. E pei o Samasoni, e faapea foi Isaraelu le tuinanau i le matagofie o nuu ese ma o latou tupua, o se vaai lea a le *Faamasino*. E pei o Samasoni, e faapea Isaraelu le fai faanatinati o ana filifiliga ma le faatopelau o ana faai’uga; e lē matuā iloilo toto’a ma lē fuafua lelei, ina ua sua le aulapa uta ma le aulapa tai, e fua i luma toe fua i tua ma autafa, e lē mana’o i le i’a a e maumau ai le upega. E pei o Samasoni, e faapea Isaraelu lo latou tu’ulafoa’i o latou tofi faa-nuu valaauina o le Atua, ma o latou tiute e tusa ma le feagaiga na osi ma le Atua.



---

Pe mata o se metotia fuafuaina lelei lea a *Faamasino*, ina ia fa'ailoa mai pea lava pea le tulaga vaivai o le faatuatua o Isaraelu? O loo aumai e le *Faamasino* se lu'itau tele, ina ia iloa e le tagata, o le a sona manatu faamaualuga ua lelei, ua potu ma ua malosi, ia na iloa *"<sup>28</sup>ua filifilia e le Atua mea maulalo ma le faatauvaava i le lalolagi, e oo i mea e leai, ina ia lafotuina mea o i ai, <sup>29</sup>ina ne'i mitamita se tagata e toatasi i luma o le Atua."* *1 Kori. 1*. E matala ma avanoa pea le lumanai e ala i le salamō faamaoni, peitai o le nuu o Isaraelu ma ona taitai latou te tapunia pea le faitoto'a o loo faamatala mai e le Atua. O i tatou o le au faitau tatou te tulimata'i ma maitau ma le faanoanoa a o faafefeteina pea loto ma'a'a o Isaraelu. E faapea foi i le silafaga paia a le Atua; a e ui lava i lea, o le alofa o le Atua mo Isaraelu aemaise i tatou le au faatuatua, o le alofa e malosi e pei o le oti. Ia manuia le faatofalaiga ma sailiga malo mo le manuia o aiga, le atunuu ma faiga malo, aemaise o le Ekalesia, ma ia i'u mea uma i le viiga faasilisiliina o le Atua. Amene.

#### Aso Tofi, 27 Aperila 2023

Tusi Faitau: *Faamasino* 16: 4–22. Matua: *"<sup>19</sup>Ua na faamoe ia te ia i ona vae; ona valaau lea i le tagata e tafi i fuafuati e fitu o lona lauulu, ona afua ai lea ia te ia ona faatiga ia te ia; ua mavae lona malosi ai ia te ia."*

#### Manatu Autu: Ua uluulu le alofa o Samasoni

Ua vaaia iinei Samasoni ua toe laveia foi e mana'oga o ona lagona – peita'i o le taimi nei, o lagona o le alofa ua uluulu e tusa ma le vaai o ona mata tuinanau. Pe mata o le a i ai se suiga ma se eseesega i le taimi nei, mai mea na tutupu talu ai? E lē faigata ona iloa, o *Faamasino* e lē o se Tusi e agalelei lana vaai i fafine. E ui ina faailoa nisi faamasino tamaitai na au le inailau e pei o Tepora ma laeli, a e sili ona manino folasaga o sauaga mata'utia le matagā ma inosia e faia i fafine, e pei o le tala i le palake a le sa Levī ma le afafine o Iefata. Peitai o loo ofoina mai e Talila ma nai isi fafine se vaaiga e faafetaia'i ai lea fesagaiga. E ui ina ua faaetia i luga o Samasoni se malosi ese faalelagi, a e ua faigofie lava ona faasesēina e faiga faatosina faaletagata/fafine o Talila. Ua fa'aalia e Talila, e pei ona sa faia e le fafine lē-igoā talu ai, le alofa faamaoni i o la'ua nuu, e sili atu nai i lo la'ua tane. Ua ta'u mai e nei fafine ia Isaraelu, le mea tonu e ta'u o le alofa faamaoni (i lo latou Atua). E oo i le

tina o Samasoni e ui ina e lē igoā foi o ia, ua na ta'u mai le ituaiga talitonuina ma faatuatuaina, e fai ma taiala e faata'ita'i i ai ona tagata. I le itu faafeagai, o Samasoni ma Iefata e ui ina o ni toa malolosi, a e ua faailoa manino o la'ua vaivaiga. O tulaga tau le malosi faa-tamatane, faa ta'ita'i, ma le faatuatua, o loo ua faamāmāsagia i faiga a Talila ma isi fafine.

Ua oo i le faai'uga, ona toe maua mai lea o le malosi o Samasoni; na maua mai se punāvai e faate'ia ai: o lana tautoga faanaseri, a e lē o sona malosiaga mai totonu, po o ni meaalofo faaleagaga faapitua mai le Atua (*"<sup>22</sup>A ua amata ona toe tupu o le lauulu i lona ulu, e pei o ona po na lē tafia ai."*). O lenei tautoga faanaseri, pei o se feagaiga osi, sa tele lava ina lē amanaia a o faamatala le tala ia Samasoni, ua aveane nei o se puna o le malosi. O le auala lenei ua aumaia ai e *Faamasino* se lu'i tele mo i tatou, ina ia faa-sopoloa la tatou vaai i mea ua iloga mai le tetele ma le tāua, a e ia maitau toto'a ma amanaia le Atua o loo galue i mea iti ma faatauvaava, aemaise o tagata faalē iloga ma itutino e manatu e vaivai. Ua oo le olaga o Samasoni i se tulaga pagatia. Na ia asiasi i Kasa i le nuu o fafine talitane, ma na faia ai tu faatalitane (*"<sup>1</sup>Ua alu atu Samasoni i Kasa, ona iloa ai lea e ia o le fafine talitane; ua ia alu ane ia te ia."*); o iina foi i Kasa na saisaia ai o ia i fusi apa memea, ma lafo i le fale puipui, na fai o ia e Filisitia pei se manu sauā e olo saitō. Na tauaso o ia i ona tuinanauga, ma sasali ese ai ona mata e ona fili. Talosia ia lē faapea ou fofoga ma o'u nei mata. Pe afai e uluulu le alofa o se tasi, ia uluulu mo le Atua a e lē o le tu'inanau mo le matagofie o le lalolagi. Fesoasoani le Agaga o le Alii e faapupula. Amene.

#### Aso Faraile, 28 Aperila 2023.

Tusi Faitau: *Faamasino* 16: 23-31. Matua: *"<sup>28</sup>Ona valaau lea o Samasoni i le Alii ua fai atu, Le Alii e le Atua, ia e manatu mai, ma e faamalosi mai tau lava i lenei toe mea, le Atua e, ina ia ou tau ma sui faatasi ia Filisitia i o'u mata e lua."*

#### Manatu Autu: Toa tatalo.

E ui lava i ni lape o le toa mai Tanu a o faasolo mai lana auunaga faa-faamasino i le amataga, a ua tualuga lana tautua tuāvae ma le tautua toto, i se fati mālie ma leo lelei. O le a lea? Ua na lagona lona faatauvaava na te lē mafaia o se mea i sona malosi na o ia, ma faasaga a'e ai ona mata i luga i le mauga e oo mai ai lona fesoasoani. E le'i tali tuālimaina lona manao e le Atua, auā o se mana'oga sa ofo atu ai

---

lona ola ia oti, ia faaumatia ai le fili sauā, a e faasaoloto lona nuu. Na toe faafouina lona malosi e faapei o le aeto, ma na faaumatia ai tupua faapaupau o Filisitia ma lona malumalu tapua'i, faatasi ai ma alii sili ma tagatanuu uma o Filisitia. Na ia fasiotia ai i lona oti, o tagata Filisitia e sili atu le toatele nai lo le aofai o i latou na ia faafanoina a o ia soifua.

Ua faate'ia la tatou vaai ia Samasoni ua ave a se toa tatalo, (e pei o Tanielu i taimi na vaai atu ai i le oti), ua faalagolago i le mana o le Atua, a e lē o sona lava ma'ema'e ma le malosi faaletagata, ma na faia ai le faaolataga mo lona nuu e ala i le fasiga faa-vavega o Filisitia. O le ā sau faitau i le tala, o sau mate ma sau vaai i le soifua o Samasoni? O le a se feau mo oe i lenei aso mai lona ola valaauina? O se faamasino malosi e manumalo, po o se tama tane toilalo i le itupā vaivai? O se ta'ita'i e tula'i mai e lavea'i i aso leaga, po o se auaua na faapologaina e ona tu'inauga? I se vaaiiga aoao tetele, ua maitauina i le soifua o Samasoni nei laasaga ma isi tulaga uma; o se soifuaga e matala i soo se faauigaga ma ituaiga faamatalaga, e pei o lana tupua na fai e tau mate. O le malosi ma le suamalie, o le alofa uluulu ma le tuinanau faaululumamau, o le taasē ma le toe fuata'iina, o le oti ma le ola, o nisi ia o matālalaga o loo mamanuina mai i le faaitaiga o le soifuaga o lenei auaua a le Atua. I le faaiuga, na o ane lona aiga ma lona nuu ua ave ma tanumia i le tuugamau o lona tamā; ua faatasia o ia ma ona tagata ina ua oti, e ui ina sa le'i faapea ina o ola o ia. O le toa i le malosi faalelalolagi, na toe fuata'iina ma maliu ua o se toa tatalo. Fesoasoani le Agaga o le Alii e faamalamalama le uiga loloto o ana afioga. Amene.

#### Aso Toona'i, 29 Aperila.

Tusi Faitau: Faamasino 19: 10 – 30. Matua: *“<sup>30</sup>E lei faia, e lei iloa foi se mea faapena talu le aso na o mai ai le fanauga a Isaraelu mai le nuu o Aikupito e oo i lenei aso; ia outou manatunatu i lenei mea, ia outou filifili, ma ia fai mai so outou manatu.”*

Manatu Autu: **O le fafine malepelepe.**

Ina ua mavae atu le maliu o Samasoni, sa le'i i ai se tupu po o se ta'ita'i ia Isaraelu. Ma o le ituaiga soifuaga maualalo sa ola ai le toatele o tagata, o loo atagia mai i le tala mata'utia i le fafine malepelepe, o le avā ma le palake a le tagata sā Levī, sa aumau i le itu o le mauga o Efaraima. Na alu le sā Levī e saili mai lana avā ua sola i lona aiga i Peteleema i Iuta,

ona o sa la'ua fe'ese'eseaiga. Na foi mai i latou (o le sā Levī, ma lana palake - o se avā faaopoopo i ia ona aso i Isaraelu, ma le auaua), ona latou ave ane lea i Kipea i le ituaiga o Peniamina e malolo ifo ai i le malae i le po. Na tau ane i ai se tasi toeaina o le nuu, ona ia faa-afe lea o le malaga i lona fale e mapu ai i le po. Ma o lea po na o ane ai tagata ulavavale o le nuu ma latou si'omia le fale, ma tauanau atu i fafo le faigamalaga, ina ia latou faia i ai tu ma aga faapaupau (e pei ona sa faia e tagata o Sotoma i le malaga na i le fale o Lota, Kenese 19). Na i'u ina tuuina atu ai le afafine o si toeaina sa tali mālō, faapea le palake a le sā Levī.

Talofa i si nei fafine, i faiga lē alofa ma sauaga matagā na faaleaga ai e tagata i le po atoa! Na malama le taeao, sauni le sā Levī e alu le malaga, e tatala atu le faitoto'a o taatia mai ai le fafine ua matuā puapuagatia ma ua vaivai. Na faaee i le asini ma latou o. Na taunuu i lona fale, ona faia lea e le sa Levī o se mea mata'utia e le'i tupu muamua i le tala faasolopito o Isaraelu – ua na fasioti i lana palake, ma pena lona tino (tulou, a o le gagana lava lea a le Tusi Paia) atoa ma ona ivi ua vaevae i tufaaga e sefulu ma le lua, ona avatu lea i ituaiga e sefulu ma le lua o Isaraelu. E pei o le tala i le afafine o Iefata, e faapena lenei tala i sauaga matagā mata'utia e faia i fafine, tina ma tamaita'i, ma fanau teine lē igoā. O tala foi e mafai ona fesoota'i ma faatusa i le taulaga a Aperamo, lea na toetoe ai a fasiotia Isaako i le Kenese 22. O le tala mata'utia ma le faatupu fefe o lenei aso, e pei o se faata'imuaga i le tala mulimuli mai i le tupu muamua o Isaraelu – o Saulo ma lona vaevaeina o povi e lua ma tufa i ituaiga o Isaraelu (1 Samu. 11). O nei tala o loo momoli mai ai ni feau tāua, ma ni lu'itau tetele mo i tatou i nei aso, faasino i sauaga matagā o faia pea i fanau, tina ma soo se tagata. E aofia ai faiga pi'opi'o ma amiolētonu e faia e tagata o i ai le pule ma le paoa, i tagata lē tualoa. E lē tatau ona tanumia nei tala ma mea e tutupu, o sauaga o fai i totonu o aiga ma nuu ma Aulotu, e ao ona faailoa uma mai i luma ina ia silafia ma faia i ai le tau ma le faamasinoga amiotonu. E lē talia i luma o le Alii nei faiga sauā a Isaraelu, po o Samoa ma le EFKS, tainane soo se itu o le lalolagi ma le Ekalesia Kerisiano. *“Ia outou manatunatu i lenei mea, ia outou filifili, ma ia fai mai so outou manatu.”* Amene.

**Ia silafia,** O le Feau o le Aso, e saunia e le aufaigaluega Ofisa Tutotonu, ma e maua i luga o le Upega Tafailagi a le Ekalesia i aso taitasi.

---

## **O LE PEROFETA** **MULIMULI**

Na feminoia'i solo Karai i lona nofoa. "Tatou te taunuu i le fale talimalo i le isi sefulu minute," na ia valaau atu ai ia i latou.

Na saoasaoa atu le taavale la'u pasese i le mea e gata ai le auala i le Vaitafe o le Iamuna. Na iila mai lona vai pei o le uamea lanu moana i le susulu malosi o le la, a o laina ai laau pama i ona autafa. O le itu tauagavale na ea a'e ai se 'olo tele na fausia i ma'a oneone lanu mūmū, faatasi ma ona puipui mauululuga ma ona pa mafafā. Ina ua taunuu atu i le vaitafe, na latou liliu ese mai le 'olo ma mulimuli atu i le pi'oga o le alāvai.

Na toe telegese le solo a taavale i luga o le ala, a e i nai minute, na matala mai ai le vaaiga i le itu agavale, e iloa atu ai se laufanua lautele o togalaau, pupu vao, o vai tuloto ma vao matua. Sa lanu meamata auvai o le vaitafe, a e o le matagofie moni sa faaopeopea i luga a'e o nei mea uma, o se ao o mapu papa'e na fesaga'i faafeagai ma le iila o le lagi lanu moana.

O le maota o le Tai Mahala.

O le galuega maoa'e o le faainisia ofoofogia ma se fausaga tulaga ese. A o le taimi nei, e foliga mai ua na o se miti, e iila ma opeopea i le vanimonimo. Na fausia e silia ma le tolu seneturi talu ai e le emeperoa Mukala o Sa Tahana, e faailoga ai le nofoaga mau o lana masiofo pele, o se molimau i le toatele o le alofa faavavau.

Peita'i e le o lo latou taunuuga lea.

Na sese'e atu le veni la'u pasese i lona itu ma taofi ai i luma o se fale fogafale lima pa'epa'e, na laina ai i ona fogafale taitasi ni faamalama lapopo'a faofofu, le fale e tali malo o le Teeta-e-Ta. O iinei latou te feiloai ma Dr. Eiteni Matasone.

"O le fale'aiga o loo i le pito i luga," na fai atu ai Elisapeta a o latou feosofi atu i fafo. Na ia siaki lana uati. Ua afa itula latou te tuai ai.

Na totogi e Karai le taavale, ma latou savavali atu ai i autafa o se vaipuna o sivasiva, i totonu o le fale sa manaia lona 'ea mālūlū.

"Koualasaki," na fai atu ai Karai ma faasino i le laulau i luma, "o atu oulua ma Luka e faamautū o tatou potu. Matou te fia o atu i le isi feau." Na ia geno atu ia Elisapeta ma Rosauo.

Na mapu sela Koualasaki, ma tomumu faaleo le fia taele i se vai mālūlū. Na ia faapepepepe mo sina sekone i tala ane o Elisapeta a o liliu atu Karai i le lifi. "O lelei mea uma?" na ia memu atu ai.

"Ia a'u?"

"I tua i le taavale la'u pasese. Sa ou faapea...ou te vaai atu..." Na ia faamimigi.

"Na o le vevela...atonu o neura," na ia memumemu ane ai.

"O ia te a'u tonu lava le pasese." Na ia faalagolago atu teisi ia te ia ma faavā lona peleue ina ia iloa atu ai sikā e lua i totonu o le taga. "E mai Kiupa. Mai le faleoloa leai se tiute i le malae vaalele."

Na ataata atu Elisapeta ia te ia. Toetoe lava a ia sogi atu ia te ia i le taimi lea.

A e na te le'i fai atu se tala, na tatagi mai le lifi i ona tua. Na valaau mai Karai e vave atu.

Na faasasa'o Koualasaki ma pō pō lona peleue. Na faa'ivi atu lona mata ia te ia a o ia liliu ese. Na faa'ivi moni lava. O ai o loo faa'ivi pea? Ui i lea, na pipii lana ataata i ona laugutu a o ia liliu atu e faatasi ma Karai ma Rosauo.

Na faafeao atu o ia e Karai i totonu ma oomi le ki o le fogafale pito i luga. "E i ai se isi mea e ao ona tatou iloa faasino ia Dr. Matasone? Na fesili atu ai Karai.

"Pau lava le mea, ia 'aua nei ta'u e se isi le Maniteseta Tuufaatasi," na ia muimui ane ai.

"Le au soka?"

"Ia outou talitonu mai ia te au, po o le tou lē toe faalogo i se upu e tasi e uiga i lo'u tamā ma ana su'esu'ega. Ma le isi, 'aua le tauānauina o ia. Tuu faitalia o ia ma le taimi e faamatala mai ai."

Na tatagi le lifi ma matala atu i se vaaiga uiga ese. O se fale'aiga tele na faatumulia ai le pito i luga, sa gaogao i le taimi lea. O laulau ua uma ona teuteuina i 'ie mananaia ma faatulaga lelei nofoa. Na sasala le manogi o le kale ma le fiu faatumulia ai le 'ea.

A o le vaaiga sa tulaga ese e lē masani ai, ona o le fale'aiga sa taamilomilo lēmū. Na taavili ma iloa atu ai itu eseese o le aai, e aofia ai ma le Tai Mahala.

I se laulau sa i autafa o se tasi o faamalama, na tula'i mai ai se tamaloa umī mai lona nofoaga. Na ia sii i luga lona lima, ona toe tuu ifo lea i lalo, ma tā tā lana uati i lona lima.

Na ataata Elisapeta ma savali atu ia te ia, laa atu i luga o le tulaga sa taamilomilo. Sa tau faalētonu muamua, a e na ia ta'ita'i atu isi i luma e ui atu i le tele o laulau sa gaogao. O le au faigaluega to'a itiiti o le faleaiga sa laei i ofu lanu auro na latou faafeiloai ane i latou.

Ua fai si tele o tausaga talu ona ia vaaia mulimuli Dr. Matesone. Sa ia laei lona suti pa'epa'e masani, e aloaia, tulaga faa-kolone, ma lona pulou lautele faa-Panama sa taatia i luga o le isi laulau lata ane. Sa i ai foi ma se tootoo, o lona 'au faa-mātau sa pi'o e pei o se uapato pa'epa'e. O lona lauulu uumi pau mai ona tau'au, sa faapea foi ona lanu sinasina tutusa, na te mautinoa e lē se tulaga e ita ai o ia. O ona foliga sa gaogaosā, taufulufulua, enaena faasolo ina lanu apa memea malosi e mautinoa e lē toe matafi.

Na fai e Elisapeta le faafeiloai aloaia. O Fomai Rosauero sa ia fa'aalia lona fiafia o se mitamitaga ua feiloai ai ma ia, ma faaumiumi vale ai lava se'ia liua le faafeiloaiga i foliga faa'ū'ū. O fafine sa fai ma vaivaiga o Eiteni, aemaise lava i le tosina o se tamaitai e tino lelei ma umi e pei o Dr. Rosaro. Sa i ai se taimi na faailo ai e le tamā o Elisapeta ia te ia, i le mafuaaga na nofo ai pea le polofesa i le Iunivesete o Mumupai, a e lē o Okesefoti po o Kemeperite. E foliga mai sa aafia ai se mataupu i sana faalilolilo ma se tama'ita'i a'oga.

Na faasino atu e Eiteni i latou uma i o latou nofoa, ma le mautinoa ia nofo Dr. Rosauero pito ane ia te ia. E fetau lo latou mautū ane i o latou nofoaga, ma le oo o le taamilosaga o le faletalimalo i le tulaga ua manino lelei ai le iloa atu o le Tai Mahala.

Na iloa lelei e Eiteni lo latou fiafia. "O le maota tele o le ti'asā na fausia mo Mumatasi Mahala, le faletua o le Sa Iani!" na ia fai atu ai ma le leo tele. "O lena faletua pele o le emeperoa na ia faia ni poloaiga se fa i lona to'alua." Na ia faailoga taitasi a o faitau i ona tamatama'i lima. "Muamua, ina ia fausia se loa lapo'a mo ia, o le mea mautinoa lena. Lua, ina ia toe faaiipoipo o ia. Se faletua ina a uiga ese! Tolu, ina ia alofa o ia i la la'ua fanau e faavavau. Ma le mulimuli, ia asiasi mai Iani i lona loa i tausaga taitasi, i le aso e faamanatu ai lona maliu. O le mea moni na ia faia lea poloaiga, seia oo i le aso na tanumia ai o ia i totonu o le Tai faatasi ma lana avā."

"O se faiga uo alofa faamaoni," o la Rosauero lea, a o ia sisila atu i fafo i le matagofie o le maota.

"A o le ā se manaia o se tala i faigā uo, e aunoa ma sina toto masa'a?" na fai atu ai Eiteni ma ia pō pō le lima o Rosauero. Na taofiofi ai lona lima agavale i luga iinā. "E faapea le tala na poloa'i Iani ina ia motusia uma lima o le au tufuga ina ua mae'a le fausia o le loa tele, ina ia mautinoa latou te lē toe fausia se isi loa e tutusa pe sili atu lona matagofie nai lo le Tai Mahala."

I le isi itu o Eiteni, na amata ona migoi Karai, e manino lona mana'o ina ia aumai le talanoaga i le auga ma le mafuaaga na latou malaga mamao mai ai i le isi itu o le kelope. Na valuvalu atu e Elisapeta lona tamatama'ivae ia Karai, e lapata'i ai ia te ia.

Na fetau la la'ua tau fai pupula.

'Aua le tuleia le tamaloa, 'aue e te faatauanauiina, na ia fesoota'i lemū ane ai.

A o faasaga liliu ese Elisapeta, a e lelea ese loa le taliga taumatau o Eiteni faatasi ma le masa'a salalau solo o le toto – i le taimi tonu na lagonaina ai le ma'ati o le pa o le u'amea tatagi, e pei o se tioata ua ta'e.

Na tau fai minoi uma Karai ma Rosauero a o Elisapeta na matuā malō i lona nofoa. Na tago atu Rosauero toso faatātā mai Eiteni i lalo i le fola; o Karai na ia 'u'u mai Elisapeta ma toso ifo i lalo. Na maua i le si'umata o Elisapeta se pu i totonu o le tioata i tua o Eiteni, sa atagia ai ta'eta'ei.

A o ia pa'ū ifo i lalo, na faaopoopo isi pu ma le tatagi o isi ta'eta'ei – ona ia taatia lea i lalo i le fola, ma Karai i ona luga.

"Taoto ai i lalo!"

Na ia faamimigi ifo a o salalau solo le olo o pulufana i totonu o le fale'aiga, mai se fanafana nanā sa i luga o fale tuaoi. Na ta'ei solo tioata. O se tasi o auauna o le fale'aiga na taavili solo, sa pei e kiki e se tasi, ma palasi faasasa'o i lalo. Na pisi solo mai le palapala i luga o maa o le fola o le fale.

Na tauanau e Karai Elisapeta e totolo ese. Peita'i sa matuā fefe o ia e minoi. E lē mafai e le fanafana nanā ona fana o ia i le mea o i ai nei. Na faasa'o atu e Karai le sesē o lona talitonuga lea.

"O loo ia mana'o e taofi ai tatou iinei!" na ia valaau atu ai ia Elisapeta ma Rosauero, o loo musu foi ia e toe gaioi.

Na malamalama lelei Elisapeta i le uiga o lea valaau a Karai. Na ia faatulaga ona lima ma ona tulivae. Ua tatau ona latou o ese.

I le taimi nei lava.

E toatele isi tagata fanafana o loo aga'i mai.

6 Setema, 1.01 aoauli.

Atumauga o Urale i Saute.

A o osofa'i atu le urosa, sa uuna'i atu e le tamaloa lapo'a ia Piota i lalo i le auvai o le vaiatafē. Na faaloloa ona lima a o ia pa'ū ifo ma taavalevale. Na gauai la laau, ma sa i ai se mea na oosia lona alafau. Na ausulusulu atu Piota aga'i i le vaiatafē, i totonu o vao

---

ma laau susū ma laau talatala mase'ese'e. Na te le'i iloa ona 'a'au. Sa avea le vai ma taufaafefe ia te ia. Na mānu a'e i luga ni auē ma auoi maamaai ese mai le tagi leotele a le urosa.

O ana uo.

Konesetatio ma Kisika.

Na taia le tulivae o Piota i se maa sa lagona ai le tiga tele e oo i lona ivitū. Na ia patatū ma taatia faasasa'o i le pito o le auvai. Na taamilo solo le vai pasi ese mai lona isu.

Na ia toe faasagatonu mai lona mafaufau mai ona mafaufauga i totonu o vai pogisa. O lana vaaiga o ia sa aau ma taavilivilivili, o le susulu o le la sa emoemo pei ni sipaka a o pesi mai le savili malosī na felelea'i solo ai lālā o laau sa tautau ifo i luga o le vaitafe.

Sa taupeupe ai Piota i lena tulaga o le fefe mata'utia, sa opeopea ai i luga o le vai pogisa ma le niniva.

Sa le'i i ai sona lapataiga i le urosa enaena, ina ua mānu a'e i o latou luma. O lona fatu agamalū sa pulea e le galala na sailia ai i latou, o lana savali na peisea'i e faatonutonu e le sailini sa lagona i o latou tua.

A e ui i lea, sa maualuga pea le fefe o Piota.

E lē ona o le vai.

E lē ona o le urosa.

O le malamalama ma le pouliuli sa taavilivilivili i ona lalo ifo. O le suaui i luga o le vai.

E lē o le urosa.

Leai, e lē o le urosa.

Na ia manavanava i le fefe.

E lē o le urosa le mea mata'utia.

O se isi mea...

1.02 aoauli.

Na togi a'e i luga e Monike lana ato faafafa, pau lea o lana auupega, a o faapa'ū atu le urosa i ona luga. Sa ia tuleia atu Piota aga'i i le vai, ma isi tamaiti e toalua i totonu o le pupuvao i le isi itu. O Marata na oso atu i se lālā laau maualalo ma suigi atu i lalo ia Piota.

Na 'e'ē a'e Monike ma lia'i atu lana ato maualuga i le 'ea.

Na tamo'e sa'o atu le urosa ia te ia. Na lia'i malosī e Monike le ato ma oso atu i le itu. Tuai teisi. A o ia lele atu, na taia e le urosa ona vae pei se nofoa afi, ma faatifa atu ai Monike i le isi itu. Na fiti ese le ato leai se aogā mai tau'au fulufulua o le urosa.

Na taia Monike i le tino o se laau lapo'a ma gaulua ifo i lalo o lona tafu'e. Na toesea mai lana mānava ua tau mole, ona ia taumafai lea e manavanava a o tau tu a'e i luga, ma ona lima i luga e puipua ai ona foliga ma lona ulu.

Peita'i sa le'i amanaia o ia e le urosa, a e na ia osofa'i sa'o ane lava i ona tafatafa aga'i atu i le auala o aila. Na toe ausulusulu atu Monike i le auala. Pe tusa o le fa sefulu iata i tala atu, na oso atu ai le urosa i ni ataata o ni manu se lua sa feosofi mai ai. E lua luko lapopo'a lava, o vae uumi ma gutu o loo faamamaga mai. Na sasau atu le lima o le urosa ma maua ai le tasi luko, sa lelea ese atu ma taavalevale. Na oso ane le isi luko fia maua le fa'a'ī o le urosa, a e na ia maua na o nifo lanu sasama ma le tagi o le faali'i feai. Na ou le luko ua lavea, a e na tau pea.

Na vaaia e Monike i tuāua o ulu o luko ni fusi u'amea. O manu tutuli mai le aai i lalo o le eleele. O sikauti. O loo i ai ma isi e tele.

Na faatopetope atu Monike e faapotopoto mai Konesetatio ma Kisika. Na oo ane ma Marata, o loo ti'eti'e mai ai Piota i lona tua. Na tago atu Monike i le tama ma faasino atu.

"Tamomo'e!" na ia musumusū atu ai.

Na latou taufetuli faatasi. Afai o loo i ai nisi tagata ma manu tutuli i le ala i o latou tua, o le a latou tau mai i le urosa. O se puipuiga lea mo i latou.

Na tepa ane i tua Monike a o fai pea le tāuga a manu i totonu o leo tetele o le tagi ma le ōu. Na tali atu le urosa i gaioiga vave ma osofaiga malolosi, fa'aalia ai le fe'ai ma le sauā faatauaso, e faavae mai le ita tele. Pe mata e masani ai le urosa i nei luko? Pe sa latou tutuli faatasi ma tagata tutuli? Pe o se isi vaega o le ola faamanu fe'ai, se gaioiga faasaga i le natura. E pei o se liona fafine o vave ona ia faaumatia sana tama e fanau mai e lē atoatoa.

Po o le a lava le tulaga, a e na maua ai e Monike ma tamaiti se avanoa faaopoopo e sosola ese ai.

A e mo le fia le umi?

2.28 afiafi. Agara, Initia.

Na faasino atu e Karai tagata uma ia ui atu i le faleaiga sa ta'eta'ei solo. Sa le'i i ai se autū manino e tafana, a e na fa'aauau pea le salalau solo o pulufana a le tagata fanafana lafilafi, sa faateteleina ina ia taofiofi ai i latou i lalo. Na tolotolo atu Karai e fia oo i le faitoto'a e ulufafo ai pe a mū. Na matala fasitepu i autafa o le lifi. Sa le'i tofotofoto i latou e o i le lifi. O ai lava na tapenaina lenei osofaiga e pu'e ai i latou, e

---

mautinoa sa i ai nisi na faatonu e leoleo lelei le lifi. Pe afai e ui i le lifi, o le a logoina ai loa i latou o faatali mai lalo. O le a maileia i latou. Na o le pau le faamoemoe o le fa'aaoga o fasitepu e oo atu ai i le isi fogafale o le fale talimalo, ma lalafi ai i se potu ma toe faapotopoto lelei ai.

O lo latou auala atu i le sitepu na fememea'i ona o le taavili o le fola, peita'i na iloa e Karai o le taamilomilo o le fola na lavea'iina ai le ola o Dr. Matesone. O le pulufana muamua sa fuafua faatatau tonu mo tua o le ulu o le polofesa. O le taamilo o le fola na sesē ma misi ai le pulufana, lavea ai na o sina manu'a mitimiti. Na faafetaia e Karai le tamā matua. Ina ua uma le ulua'i faate'ia, sa foliga mai e pei sa le'i i ai se mea na tupu. Na ia tuu ane se solosolo i lona taliga e taofi ai le tafe o le toto ua mafiafia. Sa mafai ona ia taofia lona pulou pa'epa'e ma faamaulu i lona ulu. Sa tumau Rosauro i ona autafa, o taofi le tootoo nifo elefane o le toeaina.

Na taunuu atu Karai ma Elisapeta i le potu lē minoi i luma o le fale talimalo, mulimuli atu ai Rosauro ma Matesone. "Fasitepu," na fai atu ai Karai.

"Lea ua o atu i ai."

Na emo atu Rosauro i le potu lē minoi i ana laa e lua, ona sese'e maualalo atu lea i le faitoto'a pei se tagata pesipolo o sosolo atu i le tini. Na ia se'i mālie ane se Sigi Saue otometi mai le faamoega i lona tapuvae. A o i ai o ia i ona tulivae, na ia aapa a'e i luga, tatala le 'au, ma fa'aaogā ona tau'au e tatala ai le faitoto'a, na lava le matala e ufiufi ai e lana fana ma autilo atu i fasitepu.

Na lagona vave e Karai. O seevae na pa'ō a'e i luga o le fola. E tele seevae.

"E to'a fitu i le to'a sefulu," na fai atu ai Rosauro.

Ua latou tuai. "Taofi i latou i tua," na faatonu atu ai Karai ma totolo atu i le lifi. Na maitau e Elisapeta le faamoemoe o Karai, ona ia aapa atu lea i se tasi o faamau e valaau ai, a e na poloka o ia e Karai a e na te le'i oomia. E tusa ma le faaliga mai le malamalama i luga a'e o faitoto'a, e iloa ai o loo faatali mai pea le pa e pu'e ai latou i le potu. E mautinoa o loo vaaia lelei. Na tolotoo atu Karai i se tasi o nofoaga o auauanga o le fale talimalo ma maua ai se tama'i naifi ma se taaiga o 'ie laulau. Na ia toe foi i le lifi ma sulu atu le naifi i le va o faitoto'a. Na ia vane le naifi maua ai le avanoa e momono atu ai ona tamatama'ilima ma pa'i atu i le tumutumu o se seevae i le avanoa. Na ia tulei tatala le faitoto'a i se uuna'i e tasi.

*(Soso'o atu Sulu Samoa Me 2023)*

---

## **FAAPAIA LE FANUA EFKS** **ULULOLOA MA SIUSEGA**

O le aso malolo o le Toetu, Aso Gafua 10 Aperila se tasi taeao fou mo le EFKS Ululoloa ma Siusega, na faapaia ai le fanua faatau. O le Toeaina o le Pulega Faleata Sasa'e, le Toeaina Faatonu o le Matagaluega FALEATA, susuga Misipalauni Faatau FT na taitai le sauniga, ona faailoga lea o le faapaiaina o le fanua e ala i lo latou suoina o le eleele faatasi ma lona faletua ia Tafao Faatau, o le faafeagaiga ma le faletua o le Ekalesia, susuga Kerisimasi Sani FS ma Viola, ma le tina penisione o le Aulotu ia Saumaleula Avea Vagana Talitonu. O lenei fanua e kuata eka lona tele, o loo tuaoi lava ma le fanua o loo i ai nei le galuega - o loo i autafa o le malumalu, a e luma fale i ai le maota o le faafeagaiga ma le maota o le galuega. O le molimau a le susuga i le faafeagaiga ma nisi o sui matutua o le Aulotu, ua leva tausaga o taumafai le Aulotu e faatau lenei fanua, mai ia i latou e ana nei mea totino - o nisi lava sa fai ma itutino o le Ekalesia i Ululoloa ma Siusega - a ona o le taugata o lona tau, ma nisi faafitauli na tuai ai ona faataunuu o lea miti. Peita'i o le amataga o lenei tausaga, na iloa ai o le a toe faatau lea fanua; na alu le savali i a le Ekalesia ma sa talia lelei mai, ina ia tuu mai le avanoa faamuamua i le Ekalesia na te faatauina ai. Sa faia feutanaiga ma malilie ai itu e lua i le tau e NZ\$200,000 e tusa lea ma le \$350,000 tala.

E maualuga le agaga faafetai o le susuga faafeagaiga ma le Ekalesia, o le viiga e faasilisili i le Atua ua tali mai i talosaga ma anapogi sa faia i le tele o tausaga; seanoa o Ia, e le maua faamanuiaga e tatau mo Lana galuega. E maualuga foi le faafetai i le Ekalesia Aoa, e ala i lana Komiti Faatino o Mea Tausia a le EFKS (Board of Trustees), mo le faamatuina mai o le faamalumalu \$200,000 a le EFKS i lana nogatupe i le BSP mo lea lava faamoemoe. Ua amata nei ona totogi lea nogatupe ta'i \$8,000+ i le masina, faamoemoe ia mae'a i totonu o le 5 tausaga pe itiiti ifo, pe a tusa ma le finagalo agalelei o le Atua ma lona tamaoia faasoia mai, i ana Matafale ma Aiga fesoasoani faapea le aufaigaluega ma uso a malo e lolotu ma tapua'i ai i Aso Sa taitasi. Pule alofa le Atua e aulia atu lena tau, ona fausia lea ma faatino ni atina'e fuafuaina a le Ekalesia i luga o lenei fanua. O lenei Aulotu na faavae i le taulotoaiga o le 1980s, ma o le susuga Kerisimasi ma Viola o lona tolu ai lenei o faafeagaiga, na amata galulue i le 2011. FSS.

# **\*O Ē UA MALILIU\***

## **FAAMAMĀ PAMATA** **FAAFUATA SULU**

**(3/12/1939 - 9/1/2023: 83+1+7)**

O le tinā tiakono ia Pamata, o se tasi o poutū toa o le galuega a le Atua i lenei aulotu EFKS i To'omatagi nei. E lē o maua le aso na faaetia ai lona tofi tiakono, a e ua lava ma totoe lana auauana, e fai ma molimau ola o lana tautua matavela i le Atua ma lona finagalo paia. E itiiti upu e faamatalaina ai le soifua galue o lenei auauana, auā o se tinā tiakono e lē so'ona si'ia lona sã i taimi e soālaupule ai mataupu, a e o le upu moni, e leo tele atu ana galuega i ona faiva alofilima o le tautua, nai lo upu.

Ma te taunuu mai i Toomatagi nei i le aso 14 o Tesema 2013, ua leva ona tautua i lona tofi tiakono, tusa lea ua 74 tausaga o lona soifua. O se tinā e tumu i le alofa, e tausi faife'au ma agalelei i le tagata ese sa mau faatasi ma ia. O se tinā e fiafia tele e auai i a matou sauniga lotu, i Aso Sa uma, e fiafia e auai i sauniga a le Pulega, i Potopotoga, Sauniga o le masina fou, lotu a tinā o le Pulega, o se tinā e faalototele ma faamalosi'au mo i ma'ua i le galuega, aemaise pe a tapena le usugafono mo Malua, e si'i lava lana tapua'iga.

O sauniga lotu o le amataga o lenei tausaga 2023, sa auai ai le tinā, se'ia o'o i le Aso Sa lona lua o Ianuari (08/01/2023). O le lotu mulimuli o le aso Sa lea, na faauma ai a matou Lotu Talosaga, sa faaleoina ai e le tiakono ia Pamata le vaega o le Faafetai. E leai se gasegase na aafia ai le tiakono, a e pagā lea, na faafuase'ia ona vala'auina e lona Matai sili, i le Aso Gafua 09/01/2023 i le itula e 11.40 i le taeao. Talofa, amuia lea auauana, e vala'au lona Matai, a o loo faapea ona ia fai.

### **OLONASAUNIGAFAALEAIGA:**

O le Aso Sa 22 Ianuari 2023, na aumai ai i tua lona tino maliu, mo Sauniga faaleaiga i le 3.00 afiafi.

Ta'ita'i: Fuaao Fuimaono FS

Faitauina o le Tusi Pa'ia: Susuga Patamo Soa AM

Tatalo: Susuga Semau Tepa AF

Lauga: Fuaao Fuimaono FS.

Na mae'a ona sauniga faaleaiga, ona mapu atu lea o lona tino maliu i lona maota, mo leoleoga o le po.

### **OLONA TOE SAUNIGA:**

O le itula e 11.00 i le taeao o le Aso Gafua 23/01/2023, na faia ai ona toe sauniga i le malumalu o lana ekalesia EFKS i To'omatagi nei.

Ta'ita'i: Fuaao Fuimaono FS.

Faaulufaleina o lona sa: Susuga Epati Amosa FS

Faitauina Tusi Pa'ia: Fuaao Fuimaono FS

Tatalo: Susuga Epati Amosa FS

Lauga: Fuaao Fuimaono FS

O le sauniga i lona oliolisaga tumau, sa ou ta'ita'iina. Manuia lau malaga Pamata Sulu.

**“Le auauana lelei e, ma le faamaoni, ina ulufale mai ia i le fiafia o lou Ali’i”**

***Saunia: Susuga Fuaao Fuimaono FS.  
EFKS Toomatagi  
Matagaluega APIA.***

## **FAASA'OGA!**

O le Sulu Samoa Fepuari 2023, itulau 15 i lalo o le ulutala, AUE! UA MALILIU TOA! o loo lomiai ai le tala o le maliu o le susuga Andrew Leavasa FT, ma ta'ua ai o le Toeaina Faatonu o le Matagaluega Amerika. E faasa'o atu lenei faamatalaga, ***o le susuga Andrew Leavasa FT e le'i aveia ma Toeaina Faatonu o le Matagaluega Amerika***, a e sa fai ma Toeaina o le Pulega Tutotonu, o le faafeagaiga a le EFKS Vai o le Ola. E avatu ai malu i pu'ega i finagalo o susuga Toeaina ma Failautusi o le Matagaluega ma Pulega, susuga Faafeagaiga ma Faletua ma le mamalu maua i le Matagaluega Amerika, o aiga ma soo se tasi ua afaina le finagalo ona o lenei lape i tusiga ma faamaumauga. E tatalo atu i la outou tofa faapalepale e magalo ai le sese o le auauana vaivai. Tafi mala le malaga a le susuga i le Toeaina, manuia le Matagaluega Amerika, ma le Ekalesia Aoao i lana folauga fa'auau o le tausaga. Ma le fa'aaloalo tele.

*Faatonu Sulu Samoa.*

**FAAMAMĀ PAMATA F. SULU**



**Ata o Osiga Feagaiga Aperila 2023**



**Palemia Lafolafo FS, Alosina Vavae FT,  
Iakopo Isaraelu FT @ EFKS Weymouth**



**Misipalauni & Tafao Faatau FT, @ EFKS Ululoloa ma Siusega, o faapaia le fanua faatau.**